

7.

DISSE
TAT
O ACADEMICA
DE GENTE SUMORUM,
IN ANNALIBUS RUSSICIS COMMEMORATA,

QUAM

CONS. AMPL. PHIL. ORD. ABOËNS.

PUBLICO EXAMINI MODESTE SUBJICIUNT

GABRIEL REIN,

Hist. Docens & Aman. ad Bibl. Acad. E. O.

ET

FREDERICUS CYGNÆUS,

Wiburgenses.

In Audit. Philos. die VII Aprilis MDCCCXXVII.

h. a. m. c.

ABOËS, ex officina Typographica FRENCKELLIANA.



Annales Novgorodici, ubi res cum Jemis & Svecis gentes enarrant, in tribus diversis locis mentionem quoque faciunt gentis cuiusdam cum iisdem coniunctæ, suo sermone Sum (Сумъ) appellatæ, quam inde vel ditioni Suecorum subjectam, vel finibus eorum conterminam fuisse quisque contendat, simulque, ob similitudinem nominis cum appellatione Fennorum indigena *Suomalainen*, domicilia ejusdem in Fennia quærat; cum vero ab antiquissimis inde temporibus non modo duobus, vitæ generi diversissimis, inculta erat populis patria nostra, Fennis scilicet & Lapponibus, sed etiam maiores nostri in plures distribuebantur stirpes, haud frustraneum suscepisse opus arbitrati sumus, si in disquisitionem poneremus, quænam incolarum Fenniæ pars nomine Sum fuerit significata. Occurrunt Sumi primum, quantum nobis constat, anno 1240 participes famosæ istius expeditionis a Svecis eorumque sociis contra regiones Russiæ ad Nevam flumen & Ladogam lacum sitas suscepentes, quæ victoria ALEXANDRI JAROSLAVIDIS, Principis Novgorodien sis, eo magis, quo acrius hoc ipso tempore orientales imperii partes sub jugo vexabantur Tatarorum, apud Russos evasit celebrata, & victori locum inter Sanctos ecclesiæ Græco-Ruthenicæ comparavit. Enarratur scilicet: "Anno 6748 (1240) venerunt Sveci cum magnis copiis (въ

A

"силъ

"силѣ велицѣ) & Normanni, Sumi & Jemi summa multi-
 "tudine navium, Sveci cum Principe & Episcopis suis La-
 "dogam (urbem), Novgorodiam totumque territorium Nov-
 "gorodiense occupaturi, et in Neva fluvio ad Ostium Ischoræ
 "appulerunt. Adhuc tamen Deus benignus, misericors, ho-
 "minum amantissimus nosmet protexit, & tutatus est ab ex-
 "traneis, qui frustra absque jussu Divino laborarunt. Nun-
 "cto namque Svecos Ladogam adorturos Novgorodiam adla-
 "to, Princeps Olexander, haud minimum cunctatus, cum
 "Novgorodensibus & Ladogenibus hostes aggressus, vi San-
 "cta Sophia & precibus Dominae nostræ, Matris Divinæ &
 "Virginis sempiternæ, Marie eos convicit mensis Julii die
 "15, festo memorie Sanctorum Kyrik & Ulitta, hebdomade
 "conventus Sanctorum patrum 630 in Chalcedone. Magnam vero
 "cladem ibi passi sunt Sveci & occisus est dux eorum Spir-
 "idon 1), (nonnulli Episcopum quoque ibidem interfectum fuis-
 "se contendunt,) permagnaque copia eorum cecidit. Navibus
 "vero duabus, quæ viris humoratoribus (corporibus mortuis
 "eorum) erant onustæ, in mare præmissis, inumeros cete-
 "rorum in scrobe ibi effossa abscondiderunt. Multis vero a-
 "liis vulneratis, eadem nocte, luce diei Lunæ 2) haud expe-
 "cta, pudore suffusi abierunt. Novgorodensem vero ibi
 "cecederunt Constantinus Lugotiniz, Gyrata Pinechschinitz,
 "Prefectus (Намѣстникъ) Drotchilo Nesdylow, filius coriarii,
 "et omnino una cum Ladogenibus virorum viginti, aut mi-
 "nus, sicut Deus scit 3). Princeps vero Olexander cum Nov-
 "gorodensibus & Ladogenibus salvi omnes redierunt ad suos,
 "defensi a Deo & Sancta Sophia, precibusque omnium San-
 "ctorum" 4) Deinde obvenit nomen Sum anno 1256:
 "Sveci namque, Jemi, Sumi & Didman 5) anno mundi 6764
 "venerunt cum toto territorio suo (съ всею волоштию) &
 "multitudine copiarum, oppidumque ad fluvium Narovam
 "condere cuperunt Novgorodienses, Principe tunc temporis
 "destituti, legatum miserunt in terram inferiorem (послаша

"въ низъ) ad Principem, rogatum ut milites impetrarent,
"ipsi autem nuntios ablegarunt per provincias suas (по своей
"волости) simul copias collecturos; qua re vero auditâ, ho-
"stes in pii trans mare aufugerunt" 6). Tertio denique
loco Chronicon enarrat Novgorodicum primum: "Anno
"6826 (1318) Novgorodenses cum exercitu vesti sunt trans
"mare in fluvium plenum (vel spatiosum, въ полную рѣку)
"¶ acriter sughantes occupaverunt Lyderew, urbem princi-
"pis Sumensis (сумского князя) arcemque Episcopi, & o-
"unes salvi Novgorodiam redierunt" 7). Annalium de Su-
mis testimoniis in extenso, ut ajunt, repetitis ad quæstro-
nem dirimendam proprius accedentes, observandum est
jamjam Cel. STRITTER 8) similitudinem agnovisse voca-
bulorum *Suomalainen* & *Sum*, unde colligit Fenniæ inco-
las in universum hac appellatione fuisse indigitatos; ex
quo tamen Cel. LEHRBERG quosdam popularium *Jemos*
fuisse nuncupatos demonstravit, & aliam eorum partem
apud Russos *Carelorum* nomine fuisse comprehensam in
confesso est, haud rectissimo stare potest talo sententia
STRITTERI, quia expresle *Sumi* a *Jemis* distinguuntur;
quod tamen non impedit quin ob causas jam adlatas a-
liasque postea adferendas gentem hancce in Fennia quæ-
ramus. In eadem ipsa commentatione inclytissima qua
domicilia *Jemorum* exposuit Cel. LEHRBERG, vocabulum
quoque, cuius nos iterum quæstionem movimus, expli-
candum sibimet proposuit 9). Considerans scilicet *Su-*
mos a *Jemis* in Annalibus Russicis definite separari, *Lapo-*
nnesque olim apud populos Germanicæ originis nomine *Fen-*
norum, hucusque in *Norvegia* usitato, significatos. semet i-
psos *Samelats* vel *Sabmelads*, totamque gentem *Sabme*, *So-*
me vel *Suome* appellare, contendens porro vocabula hæcce
æque ac nostratum *Suomalainen* & *Suomi* nonnisi homines
& gentem terras paludosas incolentes significasse, & Histo-
ricis tandem documentis persuasus *Lappones* antiquioribus

temporibus totam terram nostram pervagatos fuisse, in sententia subsistit: "nomine Sam in Scriptoribus Russicis hominum indigitari Lappones, eosque participes fuisse expeditionum supra relatarum, eorumque Principis urbem Abiam scilicet anno 1318 a Russis fuisse occupatam." — Summa cum oblectatione, uberrimoque fructu quæ a viro eruditissimo de Lapponibus exposita sunt perlegimus, nihilominus tamen ab opinione quam tam eximia doctrina ornatus probandam suscepit, variis considerationibus commoti decidere cogimur. — Mirum certe jam primo obtutu videri debet, cur Scriptores citati e Fennia usurparerint nomen gentis iisdem notissimæ, cum per idem hunc tempus, ut ipse testatur Cel. LEHRBERG 10), alio omnino usi sunt vocabulo populares eorum ad Lappones dictioni Russicæ subjectos significandos. In tribus scilicet foederibus Novgorodiensium cum Magno Principe Tverensis JAROSLAVO JAROSLAVIDE, initis, annisque 1265 11) & 1270 exaratis, & in tex aliis, regnante Magno Principe MICHAËLE JAROSLAVIDE inter annos 1305 & 1308 conscriptis, Lapponia appellatur *Tre*, *Ter*, *Tere* (*Tpe*, *Tpъ*, *Търь*, *Теръ*, *Търь*) 12), cuius nominis vestigia apud Svecos quoque occurtere videntur, quibus nimirum, testibus VERELIO & BURÆO, Lapponia Russiæ subiecta vocabulo *Trennes* significata est 13); in OTHERI periplo vero regiones hæcce nuncupantur *Terfinnaland* 14). Proprio igitur ad Lappones significandos nomine gaudentes, Russi, si nihilominus, ad pastores hosce Fenniam incollentes denotandos, aliam adhibuerint appellationem, eandem necessario a Fenniæ incolis usurpare debuerunt, neque facile aliquis similitudinem vocabulorum Сумъ & Suomalainen denegabit: num tamen eo adhuc tempore, quo nostra versatur disquisitio, Lappones a nostratis apellati fuerint Sumi, admodum nobis dubium videtur. Nomen Fennorum olim ad denotandos Lappones a Scandinavia.

dianis aliisque gentibus Germanicis fuisse adhibitum, & nunc quoque Norvegiæ partem septentrionalem inde Finmarkiam nuncupari notum est; similiter indigenam nostratrum appellationem in Fennia Lapponibus fuisse antiquitus inditam Cel. LEHRBERGIO haud denegabimus, quia nunc quoque vocabulis *Same*, *Sabme* & *Sabmelads* semet ipsum significat populus hicce pastorius 15); cum tamen hodierna denominatio *Lap*, *Lappo*, in Fennia probabili-
ter orta 16) anno circiter 1200 ad SAXONEM GRAMMATI-
CUM jamjam penetraverat 17), haud facile seculo decimo
tertio a majoribus nostris ulterius appellari potuerunt *Sum*
vel *Some*, neque igitur ab iisdem ad Lappones signican-
dos vocabulum quæstioni subjectum usurpare potuerunt
Russi. Unica igitur restaret suspicio a Lapponibus ipsis
nomen hocce fuisse mutatum, nisi aliis considerationi-
bus convinceremur, in locis citatis Lappones omnino si-
gnificatos non esse. Perpendentes namque quæ ab anti-
quissimis inde temporibus de Lapponib⁹ reperiuntur e-
narrata, nullibi eorum mentio sit utpote gentis bellico-
ſæ, sed e contrario utpote maxime pacificæ: quæ, armis
nonnisi ad feris insidiandum utebatur. In "mira sua feri-
"tate, fædaque paupertate," quo TACITI vixerunt ætate, ar-
mis omnino caruerunt defensoriis, sola spe in sagittis,
venatui adhibitis, posita 18); & a JORNANDE expresse *mi-*
tissimi, *Scanciæque cultoribus omnibus mitiores* appellan-
tur 19). Neque quæ deinde a PROCOPIO de Σκεπτιφίονις
20), a PAULLO WARNEFRIDI de *Scritobinis* 21), a Geogra-
pho Ravennate de *Rerefrenis* & *Sirdifenis* 22), (quibus
magis minusve corruptis nominibus Lappones semper in-
digitantur), nec quæ tandem ab ADAMO BREMENSI, quibus-
dam licet fabulis in errorem abducto, de incolis hisce ab-
ditissimæ afferuntur Scandinaviæ 23), de animo eorum
bellicoso quandam faciunt mentionem. Apparent e con-
trario tempore jam ALFREDI MAGNI (c. 900) venatu &
pifca-

piscatura occupati, Norvegis subditi iisdemque tributarii
24); enarrat quoque idem auctor OTHERI populares interdum hostiliter impugnatos fuisse a gente vicina Quænorum, tunc temporis Helsingiam, Sveciæ provinciam, inhabitante 25); qua occasione de Lapponibus idem memorare certe haud omiserit, si aliqua eidem ansa præbita fuerit. Neque SCHEFFERO quidquam de rebus gestis eorum bellicis innotuerat, unde *imbellies* eosdem appellat 26), & OLAUS MAGNUS Lappones nunquam, nisi gravi iniuria provocatos, *bella inferre* testatur 27). His, eosdem scilicet nonnisi ultima necessitate coactos in armis salutem querere, conveniunt quoque quæ a Rev. HÖGSTROM afferuntur: famam nimis divulgatam, enarrat, in ea Lapponiæ Luloënsis parte, quæ *Kaitum* dicitur 28), incolas viris armatis, e gente, ab iis *Karjel* 29) appellata, oriundis, sæpen numero impugnatos & spoliatos, tandem convenisse & consilium semet defendendi cepisse; quod tamen nec acie instructa, nec manibus in planicie hostibus consertis perficere ausi sunt, verum in colle muniti, ope trabium devolutarum aggredientes peregrinos occiderunt 30). Addit præterea alio loco auctor adlatus Lappones, rumore apud eosdem interdum divulgato, sese ad militiam tubeundam coactos fore, temporibus bellis ad ecclesiam convenire sedulo evitasse, quod tamen minus timiditati, quam potius amori eorum in patriam, quam deferere nolunt, adscribendum esse putat 31). Res hasce perpendentibus dubitatio saltim moveri debet num pastores isti unquam tales suscepserint expeditiones bellicas, quales heic de Sumis una cum Svecis & Tavastis trans mare in terram abditam factæ enarrantur; recolentes autem ulterius Ruslos navibus advectos urbem quandam Principis Sumensis anno 1318 occupasse, minus adhuc credibile nobis fit Lappones heic indigitatos esse. Omnino quidem recte Cel. LEHRBERG nomine *Lyderem Aboam*

boam nostram vel potius arcem Aboensem, quæ tunc temporis a Præfecto Finlandensi LYDERO DE KYRN 32) incolebatur, significaram contendit; bene quoque cætera descriptio cum situ Aboæ convenit: fluvius scilicet iste spatiolus nonnisi versio est vocis Fennicæ awara; unde per contractionem hodiernum ortum videtur nomen *Aura* 33). Quod præterea in Annalibus Novgorodicis de sede vel arce Episcopali (Пискупль) eodem tempore quoque occupata memoratur, probabiliter ad Castrum Kuu-stoense paullo ante ab Episcopo RAGVALDO, ejus nominis secundo, exstructum 34) referendum est. Aboam re-vera anno 1318 a Russis fuisse expugnatam monumenta quoque testantur indigena, quæ civitatem Aboensem combustam & Ecclesiam Cathedram per Ruthenos direptam enarrant 35). Quo pacto autem eadem principis vel præfecti Lapponici urbs appellari potuerit, plane nos latet: populus hicce pastorius, gregibus suis indesinenter circum-vagatus, nec domibus quidem constantibus usus, certe numquam de oppido condendo consilium cepit, & quamquam natales primariæ in Fennia urbis ignoti sint, in ea tamen plerumque substiterunt conjectura Historici, eandem Svecis, duce ERICO SANCTO ad oras nostras appulsis originem debere. Unica igitur restaret opinio Lappones eo tempore adhuc viciniam Aboæ pererrasse, nisi eadem testimoniis historicis omnino refelleretur. Occupatis enim a Svecis regionibus Finlandiae circa Aboam sitis, nullibi Lapponum utpote easdem incolentium fit mentio, verum e contrario, si nomen *Lippæ*, in bullâ Pontificis GREGORII IX, anno 1230 data, abveniens 36), ad eosdem est referendum, tantum pro vicinis ditionis Svecanæ in Fennia, æque ac Carelii & Ingri, sunt habendi, unde sedes eorum Fennis, dominium Svecorum aufugientibus & ad interiora Finlandiae loca migrantibus, fuisse coarctatas suspicatur PORTHAN 37). Occupata vero, expeditione BIR-

GERI Jarli, Tavastia, ad sedes Lapponum proprius accessisse
 videntur Sveci, quia tum demum, anno scilicet 1277 de
 iisdem subjiciendis capta reperiuntur consilia. Documentum
 omissum in Schedis BURÆI, regni Svecani quondam
 Archivarii, repertum & a SCHEFFERO passim citatum ex-
 presso testatur Lappones adhuc tempore MAGNI, cognos-
 mine *Ladulås ornati, sui fuisse juris, & quoniam Rex*
subjicere illos coronæ non poterat, obtulisse his (Bircalis 38)
puta), qui tentare rem, eosque coronæ Sveciæ subditos face-
re vellent, proprietatis jus in ipsis sese concessurum 39).
 Armis vero Sveticis ad Tavastiam usque porrectis, cer-
 te Lapponum subjiciendorum non impotens fuisset Rex,
 si viciniam Aboæ adhuc gregibus suis pererrassent: unde,
 iisdem anno 1277 jamjam e Fennia meridionali detrusis,
 urbem istam anno 1318 Principis Lapponici arcem ap-
 pellarci non potuisse, manifestum nobis videtur; neque
 qui adhuc regnante MAGNO Ladulås sui erant juris, an-
 nis 1240 & 1256 in sociis Svecorum & Tavastorum, ar-
 ma imperio Russico inferentium, facile sunt numerandi
 40). Causis igitur adlatis et si persuasi nomine *Sum* in An-
 nalibus Russicis Lappones non esse significatos, lubentis-
 sime tamen cum Cel. LEHRBERG consentimus, vocabu-
 lum hocce ad gentem Fenniam nostram incolentem esse
 referendum, & quia Aboam in ejusdem terra sitam fuisse
 manifeite indicant Scriptores, haud male credas de ma-
 joribus habitatorum hodiernorum provinciæ Aboënsis heic
 esse sermonem; cui opinioni amplectendæ aliæ quoque
 considerationes nosmet pronus reddunt. Licet namque
 ad totam nostram terram gentemque significantam vo-
 cabulis *Finnar*, *Finländare* & *Finland* usi fuerint Scan-
 diani, Sveci tamen, stabilito in oris nostris firmo domi-
 nio, præ aliis hisce nominibus Aboæ accolatæ, terramque
 eidem adjacentem nuncupasse videntur. Voces hæce
 tum præsertim arctiori isto adhibebantur sensu, ubi Fen-
 nos

nos proprie sic dictos a ceteris Fennicis stirpibus, Tavastis scilicet, Careliis & sic porro distinguere voluerunt. Sic in catalogo Regum Sveciæ antiquo, ab OLAVO Sköt-konung ad ERICUM Lüspe continuato de ERICO Sandö enarratur: "han van först Finland till Cristindoom" 41); quod tantummodo de parte Finlandiæ contendere potuerit auctor, si ampliori sensu, quo nunc vulgo adhibetur, nomen hocce intellexerit. Aequaliter in Chron. Rhyth-mico majori ubi expeditio BIRGERI, Ducis, a. 1249 suscepta commemoratur, solummodo de Tavastis disseritur, omni de Fenniis mentione omista 42); & terra a THORKILLO KANUTI occupata "hedin land" & "Carela" tantum appellatur 43). Eodem quoque sensu in bullis papalibus adhibitæ videntur appellationes adlatæ: ALEXANDER III, circa annum 1170, tantummodo de Finniis in fide Christiana retinendis 44) & GREGORIUS IX, anno 1229 *in Finlandia & ter-ris vicinis* (Tavastia sine dubio ad cuius fines verisimili-ter jam processerant novæ doctrinæ nunciæ, forte & in Carelia) *magnum populum ydolatriæ cultui servientem E-vangelicando nomen domini agnovisse* 45) loquitur. Conver-sa deinde indefesso sacerdotum & præsertim Episcopi THOMÆ studio ad fidem Christianam, vique armorum ad obsequium imperii Svecani perducta Fennia proprie sic dicta, ubi latius in terram procedendum sibi proposue-rant Sveci, tantum de Tavastis convertendis idem tra-ctat Pontifex in bulla anno 1237 data 46), & peracta tan-dem, expeditione BIRGERI Jarli, occupatione Tavastiæ, de Careliis solummodo sub ditionem redigendis quæstio-nem movet Pontifex GREGORIUS X 47). Neque seniori-bus temporibus distributio hæcce patriæ nostræ desit: ERICUS OLAI (c. 1470) e. gr. *Finlandiam affert, cum ad-junctis sibi regionibus, quæ sunt Tavastia, Carelia, Lappo-nia, Nylandia, Ostrobotnia & Alandia* 48); similiter WEXIO-NIUS: *Tenet Magnus ducatus (Finlandiæ) principatus seu*

ducatus minores, Fenniae specialiter sic dictæ, Tavastiæ, Careliae 49) etc., unde ad nostra usque tempora eadem ista permanxit divisio. Ignotum quidem est num ab indigenis ad Svecos, vel ab his ad illos transierit partitio hæcce, id tamen certum est Fennis eandem quoque interfuisse; unde Carelia ab iisdem appellatur *Korjala* vel *Karjalankmaa*, Tavastia *Håmet* vel *Håmeenmaa*, & Fennia proprie sic dicta *Suomi* vel *Suomenmaa*, ut cæteras præterream divisiones. Incolæ vero harum terrarum appellabantur *Karjalainen*, *Håmäläinen*, *Suomalainen* 50); & quamquam ultima hæcce nominatio communis jam evasit toti populo nostro, mos tamen antiquior nondum plane oblivioni est iraditus, quippe qui, ut certos nosmet fecit Rev. RENVALL, in quibusdam Tavastiæ partibus adhuc retinetur, ubi quum terram in vicinia Aboæ indigitare volunt, eandem *Suomenmaa* appellant. Quibus igitur considerationibus commoti in ea subsistendum duximus sententia: "Nomen Sum in Annalibus Russicis non Lappones significare, neque Aboam Principis Lapponici nominatam fuisse urbem; verum in tribus istis locis citatis de Fennis proprie sic dictis esse sermonem, appellationemque hancce inde rarius apud Scriptores Ruthenorum occurrere, quia rarius ad regiones hasce Fenniae magis abditas populares eorum penetraverant 51), vocabulumque apud ipsos inde minus evaserat divulgatum; unde omnes majores nostri, Careliis tantum exceptis, diu in Russia, communi Fennorum nomine comprehendebantur." — Quæ quam firmis innitatur argumentis opinio, benevolæ Lectoris cœluræ examinandum & dijudicandum submittimus, omnibus ulterioribus, Fenniæ proprie sic dictæ fines vel fata demonstraturis, disquisitionibus omissis, quæ utpote definitu difficiliores, magisque a proposito præsenti alienæ, latius quam fas est harum extenderent pagellarum ambitum.

1). Men-

- 1). Mendam heic irrepsisse descriptoris recte observat Cel. LEHRBERG (Untersuchungen zur Erläuterung der ältern Geschichte Russlands, herausgeg. von Ph. KRUG S. 159, Note 3.), quia Archiepiscopus t. t. Novgorodiensis SPIRIDON est appellatus.
- 2). Die solis pugnam igitur commissam fuisse appareat, quod omnino cum indice temporis supra adlata convenire testatur Cel. LEHRBERG: Cf. l. c. Nota 2.
- 3). LEHRBERG l. c. Russorum мужъ vertit cum Germanorum Mannen, contenditque heic de viris honoratioribus tantum esse sermonem. Eandem quoque sententiam profitetur Cel. Stritter (Исторія Россійскаго Государства Ч II, стр. 73, nota 2).
- 4). Consulatur Лѣтописецъ Новгородскій sic dictus II:us (Москва 1781) стр. 132. Лѣтопис. Новг. sic dictus I:us; in Продолженіе древней Россійской Вивліоѳики Ч. II obveniens, heic h. bet lacunam. Gentem Sum huic expeditioni interfuisse testantur quoque ex iis quos mihi invisere licuit Annalibus: Софійскій Временникъ (Москва 1820) Ч. I, стр. 251 & Лѣтописецъ Руской (Chron. Susdalense) Изд. Н. Л. (СПб. 1792 sqq.) Ч. II, стр. 13.
- 5). DIDMANNUM huncce vasallum fuisse Danicum in Estonia, prope fines Russiæ habitantem, suspicatur Cel. LEHRBERG p. 170; Ill. KARAMSIN tamen (Ист. Росс. Ч. IV. прим. 95,) contendit Magistrum provincialem Ordinis Teutonici in Livonia apud Lettones hoc nomine fuisse nuncupatum.
- 6). Нвгр. I, стр. 533 sq. Нвгр. II, стр. 142.
- 7). Нвгр. I, стр. 581, Нвгр. II, стр. 173.
- 8). Исп. Росс. Ч. II, стр. 72. 9). L. c. p. 198—212.
- 10). L. c. p. 29, 217 & 227.
- 11). Древняя Россійская Вивліоѳика; Изд. 2, Ч. 1, стр. 1 & 4 annum indicat 1263.

- 12). Vid. Собрание Государственныхъ грамотъ и дого-
воровъ Ч. 1 стр. 1—13 passim.
- 13). VERELIUS in notis ad Herraudi & Bosæ Sagan p. 72. BU-
RÆUS in SCHEFFERI Lapponia p. 25.
- 14). Ed. PORTHAN in Vitterheits Acad. Handl. D. VI, S. 66.
& RASK in Skand. Litt. Selsk. Skrift. Aar 1815. S. 30.
- 15). HÖGSTRÖM, qui permultos in Lapponia vixit annos, in opere: Beskrifning öfver de til Sveriges Krona lydande Lappmarker S. 44, nomen *Same* tribuit Lapponibus & *Some* Fennis nostris; Cfr. ibid. S. 52 & 56. Idem nostro ævo contendit Cel. GEIJER: Svea Rikes Häfder D. 1, S. 416: "De egentelige Finnarne heta hos Lapparna So: "me eller Suome, sjelfve kalla sig Lapparne Same, Sabme "eller Sabmelads." Hisce consentiunt SCHEFFERUS in Lapponia p. 6, LEEM in Beskrivelse over Finmarkens Lapper p. 9 sq. & PORTHAN Undersökning om de Nationer, hörande till Finska Folkstammen, hvilka i den äldre Nordiske Historien omtalas in Vitterh. Hist. och Antiquitets Acad. Handl. D. IV. S. 44; unde dubium nobis videatur quod auctoritate Celeberrimi IHRE innitus contendit LEHRBERG "Lappones semet ipsos Suome quoque appellare."
- 16). Nomen *Lapp* haud facile originem ducere potuit a Scandinavianis, quibus scilicet Lappones, æque ac majores nostri, communi Fennorum diu comprehendebantur appellatione, neque prius novum istud innotuit vocabulum, quam post adventum Svecorum in Fenniam, duce ERICO SANCTO; unde suspicari licet, nomen apud majores nostros usitatum a Svecis ad duas hasce diversas, patriam nostram incolentes, gentes discernendas fuisse usurpatum. Neque apud Russos ortam esse appellationem hancce facile intelliges, ubi consideres anno demum 1396 vocabulum *Lop* in Scriptoribus eorum occurtere; Cfr. Русская Льшом, по Никонову списку, Ч. IV. стр. 268. Pa-
xiter

riter Lapponibus ipsis originem vocis adscribere non possumus, quia nomen hocce non modo inter eos ipsos parum est vulgatum (HÖGSTRÖM S. 56), verum quod eodem sese maledictos arbitrantur, unde SCHEFFERUS (*Lapponia* p. 5.) verba affert OLAVI NIURENII: "Populi primates, cum "eo se salutari titulo (*Lapponum puta*) audiunt, non parum stomachantur;" idem de Lapponibus Norvegicis testatur LEEM l. c. p. 9; cfr. præterea quæ, pro more erudite, de nominis Lapp origine e lingua Fennica exposuit LEHRBERG l. c. p. 220 sq.

- 17). SAXO GRAMMATICUS in Hist. sua Danica, ex ed. Stephani L. V. p. 85 primus duplicitis Lapponiæ facit mentionem. Apud Islandos primum occurrit nomen hocce in historia *Fundin Noregur* inscripta, quam medium seculi decimi secundi ætate non supercedere contendit Cel. P. E. Müller, in Sagabiblioth. 2 en Bind, S. 443.
- 18). TACITI Germ. c. 46. 19). De reb. Geticis edid. LINDEN-BROGIUS p. 82.
- 20). De bello Gothicó, L. II, Cap. XV: Σηρίθιφνοι Θηριώδη τινα βιοτὴν ἔχουσιν· οὔτε γὰρ ιματία ενδιδυσκούσι, οὐδὲ υποδεδέμενοι βαδίζουσιν, οὔτε πίνουσιν, οὔτε τι ἐδάμιμον ἐκ της γης ἔχουσιν, οὔτε τι αὔτοις αἱ γυναικες ἐργάζονται· ἀλλά ἀνδρες αἱ ξυ ταις γυναιξὶ θηραν μόνην ἐπιτηδευούσι.
- 21). De Gestis Longobard. L. 1. Cap. V. Scritobini — etiam æstatis tempore nivibus non carent, nec aliis, utpote feris ipsis ratione non dispares, quam agrestium animantium carnibus vescuntur; de quorum etiam hirtis pellibus sibi indumenta coaptant. Hi a saliendo, juxta linguam barbam, etymologiam ducunt. Saltibus enim utentes, arte quadam ligno incurvo, ad arcus similitudinem, feras assequuntur. Apud hos est animal, non satis absimile cervo, de cuius ego corio, ut fuerat pilis hispidum, vestem in modum tunice, genu tenus aptatam conspexi, sicut jam fati, ut relatum est, Scritobini utuntur.

- 22). De Geographia L. IV, Cap. XII: Juxta litus Oceanum, ponitur patria, quæ dicitur Rerefrenorum & Sirdefenorū. Cujus patriæ homines, ut ait Aithanarit, Gothorum Philosophus, rupes montium habitant, & per venationes, tam viri quam mulieres vivere, cibo vel vino ignari existentes in omnibus. Quæ patria super omnes frigida esse adscribitur.
- 23). Hist. Eccles. Cap. 239: Omnes (incolæ) vero sunt Christianissimi, qui in Nordwegia degunt, exceptis illis, qui, trans arctoam plagam, circa oceanum remoti sunt, quos adhuc ferunt magicis artibus, sive incantationibus intantum prævalere, ut se scire fateantur, quid a singulis in toto terrarum orbe geratur; tunc etiam potenti murmure verborum grandia cete maris in littora trahunt, aliaque multa, quæ de maleficiis in scripturis leguntur, illis ex usu facilia sunt. In asperrimis etiam, quæ ibi sunt, Alpibus audivi mulieres esse barbatas, viros autem silvicolas raro se præbere videndos. — In eisdem montanis agrestium tanta est copia ferarum, ut plurimæ pars regionis ex solis vivat silvaticis. — Ad locum huncce Scholiastes ADAMI addit: Eadem montana Romani autores Riphea iuga nuncupant, perpetuis horrida nivibus. Scritefingi vivere non possunt absque frigore nivium: qui feras etiam suo cursu per altissimas nives prævolant.
- 24). Cfr. OTHERI PERIPLUM ed. PORTH. p. 72; ed. RASK p. 36.
- 25). Ibid. ed. PORTH. p. 78 sqq. ed. RASK p. 40. 26) Lapp. p. 45.
- 27). Hist. de Gentib. Septentrionalib. L. IV, Cap. V.
- 28). Vid. TUNELDS Geogr. D. III, S. 219.
- 29). Hoc nomine Lappones plerumque significant Russos, quia appellationem gentis iisdem proximæ, Russiæque antiquitus subiectæ, Careliorum scilicet, ad totum extenderunt imperium, æque ac Lithuania quondam eosdem Russos nuncupaverunt Krewe, a Kriwitschis Russiæ subditis sibi pro.

- proximis (Cfr. SCHLÖZERS Allgem. Nordische Geschichte S. 510), unde sub nomine Karjel de Russis heic esse sermonem pro certo habet HÖGSTÖM, nihil tamen impedit, quin Carelios proprie sic dictos hujus rei participes credamus.
- 30). HÖGSTÖM l. c. p. 59 sqq. 31). Ibid. p. 157 sq.
- 32). Vid. PORTHAN ad Juust. p. 221.
- 33). Fluvius quidem per se minoribus adnumerandus est, respectu tamen habitu rivuli Wähäjoki, prope Aboam in eundem sese effudentis, nomen spatiosi accipere potuit.
- 34). JUUSTENI Chron. Episcopor. p. 14 annum indicat 1317, quo exstructum est castrum Kuustoënse, Fragmentum Palmskoldianum autem in Sylloge Monumentor. a Gel. PORTHAN edita p. 7 annum 1307.
- 35). Vid. JUUSTENI Chron. p. 15. Fragm. Palmskold. hoc fidum esse feria 2 Pontecostes enarrat, anno tamen omissio; cfr. Syll. Monum. p. 7.
- 36). Syllog. Monum. p. 29 sq. PORTH. ad Juust. p. 102 & 775.
- 37). Ad Juust. p. 98.
- 38). De Bircarlis legatur Diss. a Rev. FRANZÉN Præs. PORTHAN annis 1786 & 1789 Aboæ edita.
- 39). SCHEFF. Lapp. p. 54, 151 sqq.
- 40). Quia sacerdotibus, ut testantur annales Russici, anno 1240 Sveci erant comitati, expeditionem hancce originem duxisse colligas ex voluntate & jussu Pontificis GREGORII IX, qui bulla 1237 Laterani data omnibus viris Catholiceis in Svecia & vicinis insulis (terris) mandavit, ut contra apostatas & barbaros (Tavastos) crucis signaculum assumerent, eadem peccatorum venia, quam si in terram sanctam personaliter sese transtulissent, insimul concessa; Cfr. Syll. Monum. p. 37—40; quo namque Russos deterrenter, ne Tavastis auxilium ferrent, recta via cursum in fluviū Nevam direxerunt Sveci, neque mirum videtur Norvegos,

vegos, etsi iisdem non subditos, tamen jussui papali obtemperantes belli hujusce fuisse socios, quod vero de Lapponibus eousque paganis contendi non potest.

- 41). Rerum Svecicar. Medii ævi Scriptores, P. I Sect. I. p. 11.
 - 42). Ibid. P. I, S. II, p. 6. 43). Ibid. S. I, p. 26, 63; S. II, p. 20.
 - 44). PORTH. Syll. Mon. p. 14 sqq. 45). Ibid. p. 22 sq.
 - 46). Syll. Mon. p. 37 sqq. 47). Syll. p. 42 sq.
 - 48). ERICI ORAI Hist. Svecor. Gothorumque ed. MESSENIUS p. 9 sq.
 - 49). Epitome Descriptionis Sveciæ, Fenniæ etc. L. 1, cap. 22.
 - 50). Cfr. Lex. Finn. Autore G. RENVALL.
 - 51). Exposuit quidem, consultis tam Russicis quam Fennicis antiquitatis monumentis (Herp. I, cnp. 420, Chron. Juust. p. 12. Fragm. Palmisk. p. 5), Cel. LEHRBERG, l. c. p. 135 sq. anno jamjam 1191 Russos, una cum Careliis, via maritima Aboam usque penetrasse, & nihilominus in Annalibus Novgorodicis, expeditionem hancce enarrantibus, tantummodo de Jemis, omni de Sumis mentione omissa, disseritur; quo tamen sententiam nostram supra adlatam haud refelli putamus, quia cum Russi rarius tantum ad hæcce penetraverant loca, nomen terræ proprium diutius Scriptoribus eorum ignotum permanere potuit.
-